


RELATION
DE CE QVI S'EST
PASSE' A PARIS,

Depuis l'enleuement du Roy
jusques à present.

Enuoyée aux Prouinces.



A P A R I S,

Par les Imprimeurs & Libraires ordinaires
du Roy.

M. DC. XLIX.

Avec Privilege de sa Majesté.

RELATION

DOCE ONI TEST

you are now in a way

now

1813

The following is a list of the names of the persons who have been

in the

of the

of the



LE Parlement apres auoir obtenu de la Reyne la Declaration du mois d'Octobre dernier, se promettoit que l'Estat & les Peuples oppressez pourroient ressentir quelque fruit & quelque soulagement de ce qui luy auoit causé tant de traux & tant de peines.

Mais contre ces esperances il s'en rencontroit peu d'articles où il n'eust esté notablement contreuenu presque au mesme temps que l'on les auoit accordées : Ce qui luy donna sujet de s'assembler diuerses fois pour en examiner les contrauentions principales.

Et passant outre, chercher les moyens doux & faciles & sans aucune surcharge du Peuple, pour soutenir la guerre cette prochaine campagne, attirer les troupes d'Allemagne au seruice de sa Majesté, & obliger les ennemis de cette Couronne, de consentir à vne Paix generale.

Plus le procedé du Parlement estoit sincere & aduantageux à l'Estat, plus il estoit odieux, & augmentoit les craintes du Cardinal Mazarin, qui ne voyant plus de retraite & de seureté pour luy dans les pais Estrangers, se resolut enfin, ou de perdre le Parlement & cette Ville capitale, ou de s'enterrer luy mesme dans les ruines de l'un & de l'autre.

Et pour venir à bout de ses pernicious desseins. Le sixiesme de Ianuier jour des Roys à deux heures du matin, il enleua le Roy & Monsieur le Duc d'Anjou son Frere, s'empara de leurs personnes, & les conduisit à Saint Germain en Laye. Au bruit d'une si fascheuse nouvelle toute la Ville s'estant trouuée dans vn trouble & dans vne surprise incroyable, le Parlement s'assembla extraordinairement l'apresdisnée, & ne peust faire autre chose que de donner quelques ordres pressans & necessaires à la Police de la Ville.

Mais le lendemain les lettres escrites aux Preuost des Marchands & Escheuins de cette Ville ayant esté leuës dans la Compagnie, il s'y trouua que le Cardinal sous le nom du Roy supposoit que quelques Particuliers du Parlement auoient intelligence avec les ennemis de l'Estat, & leur imputoit le crime dont il estoit luy mesme coupable, d'auoir voulu se saisir de la personne du Roy, afin de donner pretexte à l'enleuement qu'il en auoit fait. Il fut vnaniment resolu, que les Gens du Roy iroient à Saint Germain trouuer leurs Majestez, pour les assurer de sa fidelité & de son obeyssance, leuer ces calomnies, ou

les supplier tres-humblement de vouloir nommer les coupables du crime porté par ces lettres pour en faire vne punition exemplaire. L'on refusa de les entendre, on ne les voulust ny voir ny recevoir, ils demeurèrent toute la nuit sur le pavé, & ils ruinèrent avec cette nouvelle, que la Ville estoit bloquée : Ensuite dequoy fut apporté sur le Bureau vn Arrest du Conseil, portant defences à peine de la vie d'amener des viures en cette Ville.

La guerre estant déclarée d'une façon si extraordinaire, il fut aisé de voir que le Cardinal Mazarin pour establir sa tyrannie, & disposer plus absolument du Royaume, auoit resolu la perte du Parlement & de la Ville de Paris, qui ne peut arriuer sans la subuersion entiere de cet Estat. De sorte que le Parlement se creust obligé d'aller à la source d'un mal si pressant, & d'en couper promptement la racine. Ce qui donna sujet à l'Arrest contre le Cardinal Mazarin, que nous vous enuoyons, & à celuy qui ordonne la leuée d'un nombre suffisant de gens de guerre pour la defense de la Ville, & pour la seureté des conuois de viures.

Ce second Arrest a esté heureusement executé par la genereuse vnion qui s'est trouuée esgale dans tous les ordres de cette Ville, & les contributions y ont esté volontaires. L'on a leué en peu de jours plus de douze à treize mil hommes de pied, & quatre à cinq mil cheuaux, tous gens d'eslite & d'experience dans les armes. Les ordres pour la Police & les viures, pour les Finances, pour les passeports, & depuis peu de iours pour les despêches, estant si bien réglés par autant de Chambres composées de Deputés de toutes les Compagnies Souueraines, outre les conseils de guerre. Le Parlement demeurant perpetuellement assemblé : Il n'y a personne qui ne iuge que dans vne telle conduite, vne cause si juste & des intentions si sincerés, ne soient assistées des benedictions du Ciel.

Il nous vient tous les jours des viures abondamment, & les marchés sont tellement remplis, qu'il n'arriue aucun desordre ni tumulte, de sorte qu'il n'a pas esté besoin de faire sortir les bouches inutiles, ni de fermer les portes à ceux qui y viennent tous les iours en grand nombre.

Monsieur le Duc d'Elbeuf fut le premier qui s'offrist pour la defense d'une si juste cause. Et le iour mesme Monsieur le Prince de Contry se retira de Saint Germain avec Monsieur le Duc de Longueville, le Prince de Marillac & le Marquis de Noirmontier, pour asséurer le Parlement & la Ville de leur passion pour le bien public, & du ressentiment qu'ils auoient des conspirations du Cardinal Mazarin. Ils entrèrent le lendemain au Parlement, & Monsieur le Duc de Bouillon & y treuua avec Monsieur le Marechal de la Motte Houdancourt.

L'ordre

L'ordre des sceances & des emplois fust bien-tost reglé entr'eux, & conclu sur le champ avec vn contentement incroyable de toutes parts, & avec vn aplaudissement vniuersel de tous les ordres de cette Ville. Monsieur le Duc de Longueville se resolut à demeurer avec nous dans Paris pour assister Monsieur le Prince de Conty son beau-frere, de ses conseils; & quand il a esté aduertý de quelque faction du Cardinal Mazarin dans son Gouvernement de Normandie, il nous a laissé pour gage de son affection Messieurs ses enfans & Madame sa femme qui est logée dans l'Hostel de Ville, où elle a accouché d'un fils. Et il est à present en Normandie, où par son arriüée il a étouffé entièrement les partys contraires, & a esté receu dans la Ville de Rouen, dans le Chasteau & dans le Parlement, avec vne satisfaction incroyable de tout le monde. La Noblesse y arriüe de tous les endroits de cette Province; & il leue des troupes si considerables, que dans peu de iours nous nous en pouuons promettre des effets aussi grands, que nos ennemis en resmoignent d'apprehension.

Monsieur le Prince de Conty fut declaré Generalissime, & comme il a le courage & l'esprit aussi heroïque que sa naissance est illustre & considerable, il a sujet d'esperer toutes sortes d'heureux succez de sa conduite. Monsieur le Duc d'Elbeuf est General, & doit estre assisté des Princes de Harcourt, Comte de Rieux & de l'Isle-Bonne ses fils, qui ont leué des Regimens. Monsieur le Duc de Bouillon & Monsieur le Marechal de la Motte-Houdancourt sont aussi Generaux, tout le monde est assez informé de leur experience, par les grandes actions qu'ils ont faites, & c'est assez de leur nom, pour faire connoistre leur merite.

Après eux est arriüé Monsieur le Duc de Beaufort, qui a esté receu Duc & Pair de France, & aussi declaré General; si bien qu'il ne semble rien à desirer en tous nos Chefs, soit de prudence, de valeur, ou de qualité. Monsieur le Duc de Chevreuse, & Monsieur le Prince Palatin fils du Roy de Boheme, sont venus faire offre de leur seruice au Parlement, comme aussi Messieurs les Ducs de Brissac & de Luynes.

Nous ne pouuons obmettre les affections & les soins que Monsieur le Coadiuteur en l'Archeuesché de Paris, a pris en toutes les occasions qui se sont presentées. Ce qui a donné sujet au Parlement de luy accorder sceance, & voïx deliberatiue, par la bouche duquel nous auons receu les assurances de Monsieur le Duc de Rets son frere.

L'Vniuersité & le Clergé de cette Ville, non seulement par leurs contributions, mais par toutes autres voyes, ne cessent point de rendre des resmoignages de leur zele pour vne cause si iuste & si legitime.

Il seroit mal-aisé de nombrer la quantité de Marechaux, de Me-

tres de Camp & de Seigneurs de marque, qui se sont déclarés pour le mesme party; nous les nommerons confusément.

Et premierement le Prince de Marillac Gouverneur de Poictou, Lieutenant General; le Marquis de Noirmonstier aussi Lieutenant General, qui a fort dignement serui sa Majesté en plusieurs campagnes, le Comte de Maure aussi Lieutenant General; le Marquis de Vitry Gouverneur de Meaux; le Marquis de Fosseuse; le Marquis de la Boulaye; le Marquis de Duras & son frere, le Comte de Fiesque; le Marquis d'Alüye; le Comte de Matha; le sieur de Laigue; le Marquis de Beuron, & Messieurs de Seigny.

Ce sont toutes personnes illustres en dignités, en seruices, & qui ont avec eux quantité de Gentils-hommes & gens de Commandement. Il y a encore beaucoup d'autres Seigneurs qui se declareront dans les Prouinces, comme ont fait Monsieur le Duc de Rets à Belle-Isle dans la Bretagne, le Comte de Carces en Prouence, & en Normandie le Comte de Matignon Lieutenant du Roy, le Comte de Flex, & presque generallyment toute la Noblesse.

Quelques Parlemens ont desia pris la part qu'ils deuoient en cette affaire. Celuy d'Aix a commencé le premier, & toute la Prouence s'estant mise en armes pour resister à la violence queluy preparoit par l'ordre du Cardinal Mazarin le Comte d'Allais son Gouverneur, elle s'est saisie de sa personne & de celle du Duc de Richelieu, & ont arresté les Galeres au port de Marseille. Les Deputés de ce Parlement estant venus en cette Compagnie, y ont representé les iniustices, & les outrages faits à leur Compagnie, & les exactions commises dans la Prouince: Et ont demandé la jonction, tant pour la suppression du nouveau Semestre, que pour noier vne parfaite correspondance dans tout le cours de cette affaire. Ce qui leur a esté accordé, & ont esté donnez les Arrests que nous vous enuoyons.

Celuy de Roüen a semblablement tesmoigné par vn Conseiller député de sa part, qu'il se sentoit obligé de joindre l'autorité qu'il a dans la Normandie à celle de Monsieur le Duc de Longueville, pour nous assister en vne affaire de si haute consequence, pour le seruice du Roy & conseruation de son Estat. Le Député nous a apporté trois Arrests, l'vn pour la jonction, l'autre pour la saisie des deniers publics, & le dernier pour la cassation du Semestre iniustement estably dans le mesme Parlement. L'on a donné pareil Arrest que pour celuy d'Aix, avec cette clause pour tous les deux Parlemens, qu'il ne se fera rien à l'aduenir qui puisse blesser l'autorité du Roy, le bien de l'Estat & les interets de leurs Compagnies; ce qui attrait tous les autres Parlemens. Ce qui fait bien voir que s'agissant de la conseruation de l'Estat, ils ne veulent auoir qu'un mesme esprit & vne mesme conduite pour en empêcher la ruine.

[Nous ne doutons pas, que les pernicieux conseils du Cardinal Mazarin estans venus à la connoissance de toute la France, & ses crimes notoires à vn chacun, ils ne soient condamnés par Arrest dans tous les Parlemens, pour affermir d'un consentement general l'autorité Royale, & la liberté legitime de tous les sujets de sa Majesté. Nous croyons aussi que toutes les Villes de leur ressort seront dans les mesmes sentimens d'amour pour l'Estat que plusieurs du nostre qui se déclarent tous les iours. C'est le moyen de preuenir l'intention qu'a ce mauuais Ministre, de nous jeter dans vne guerre ciuile, pour perdre l'Estat avec luy.

La resistance non preueüe qu'il a trouuée à son entreprise, l'oblige à present de joindre l'artifice & le mensonge à la force ouuerte; il fait escrire par tout que nous sommes reduits à la dernière extremité de famine, afin que ceux qui nous voudroient secourir ayent sujet de desesperer de leur diligence; il publie qu'il y a de la diuision entre nous, & que nous manquons de toutes les choses necessaires pour soutenir la guerre, & particulièrement d'argent. Ainsi nos ennemis employent malicieusement contre nous, ce que nous sçauons d'eux avec assurance par leurs propres Lettres interceptées, & par ceux qui les quittent pour ce sujet, & viennent tous les iours prendre party dās nostre armée.

Dieu nous a donné suffisamment de quoy viure long-temps sans necessité, de l'argent & des munitions pour entretenir la guerre plus de mois qu'ils ne la peuuent soutenir, & l'vniō du Peuple avec tous les ordres de cette Ville est si grande, que l'on ne peut pas voir vne plus parfaite intelligence. Le Parlement seul a fourny vn million de liures, & toutes les autres Cours & Compagnies à proportion. Outre cela l'on a trouuē de grandes sommes de finances recellées par les Partisans & gens d'affaires, & nous auons arresté tous les deniers publics: Si bien que nous auons de quoy soutenir cete guerre, en laquelle on nous a jettés par necessité, & la continuer & conduire sans fouler le public. Il n'en est pas de mesme dans l'autre party, les soldats qui sont pour la plupart estrangers ne sont point souldoyez, & l'on leur abandonne inhumainement le pillage de la campagne, ils y sont par tout des cruautéz qui ne se peuuent descrire, & que la posterité aura peine de croire.

Les Suissés ont par vn acte solennel entr'eux déclaré, qu'à faute de leur payer des sommes notables qui leur sont deuës du passé, & auxquelles il est impossible de satisfaire, ils se retireroient en leur pays, & ont enuoyé en Cour exprés pour demander leur congé. Et il n'est pas possible au peu de troupes du Cardinal Mazarin, de garder & deffendre différens postes en mesme temps.

Nous allons mettre en campagne, & nous ne doutons pas qu'en cete occasion toutes les Villes ne desbient l'assistance que l'on leur

pourroit demander en faueur du Cardinal Mazarin fous le nom du Roy qu'il vſurpe, & qu'elles ne manqueront pas de refuſer paſſage aux troupes qui leur pourroient venir, & d'arreſter les deniers qu'ils voudroient tirer des receptes des Prouinces: Et particulierement encore elles ſont inuitées de n'adiouſter aucune creance aux nouuelles qu'ils pourroient ſemer de leurs aduantages. Nous aurons vn ſoin particulier de les tenir informées de la verité de tout ce qui arriuera, & par ce moyen la France vnie & iointe en vn meſme intereſt, arreſtera dans ſon commencement vne guerre ciuile qui la menace d'un embrasement vniuerſel, & le Cardinal Mazarin ſera contraint de vider le Royaume, ſ'il veut éuiter la peine de ſes attentats contre le repos public & l'autorité du Roy.

BOSTON PUBLIC LIBRARY



3 9999 05291 347 0

